

XEFATURA DO ESTADO

20650 *REAL DECRETO LEI 9/2004, do 3 de decembro, polo que se determina o prazo para a execución dos procesos previstos na Lei 16/2001, do 21 de novembro, pola que se establece un proceso extraordinario de consolidación e provisión de prazas de persoal estatutario nas institucións sanitarias da Seguridade Social dos servizos de saúde do Sistema Nacional de Saúde.* («BOE» 292, do 4-12-1004.)

A Lei 16/2001, do 21 de novembro, estableceu un proceso extraordinario de consolidación de emprego para o persoal estatutario das institucións sanitarias da Seguridade Social. Tal proceso extraordinario artículase en dous sistemas sucesivos. Primeiro, o de selección de persoal e, con posterioridade, o de provisión de prazas. A disposición adicional novena da devandita norma determinaba como prazo límite para a realización dos procesos que derivasen dela o de 18 meses contados desde a publicación de cada convocatoria no «Boletín Oficial del Estado».

A extrema complexidade do proceso de consolidación establecido na citada lei, cuxa segunda fase, a de provisión, prevé ata tres mecanismos sucesivos de adxudicación de prazas, e o elevado número de convocatorias, de prazas ofertadas e de aspirantes presentados e admitidos aos procesos, fixo imposible o cumprimento do indicado prazo. Por dúas veces, nas leis 53/2002, do 30 de decembro, e 62/2003, do 30 de decembro, ambas de medidas fiscais, administrativas e da orde social, foi prorrogado o devandito prazo, primeiro ata o 31 de decembro de 2003, e despois ata o 31 de decembro de 2004.

Ambas as prórrogas se manifestaron, de inmediato, claramente insuficientes. Así, o 31 de decembro de 2003, a tramitación da primeira das fases establecidas, a de selección, só concluíra nunha das 89 convocatorias tramitadas polo Ministerio de Sanidade e Consumo. Similar situación se producía nas catro comunidades autónomas que convocaran procesos de consolidación ao abeiro da Lei 16/2001, do 21 de novembro.

Malia que, desde o mes de maio de 2004, o procedemento coñeceu un innegable impulso no seu desenvolvemento, será imposible que as convocatorias das categorías cun maior número de prazas e de aspirantes estean concluídas antes do 31 de decembro de 2004.

A inmediata finalización do prazo legalmente establecido determina a necesidade de articular un novo prazo que permita a adecuada finalización dos procedementos iniciados tras a entrada en vigor da Lei 16/2001, do 21 de novembro, para que se poidan así cumprir, coa imprescindible seguridade xurídica e o suficiente amparo legal, os obxectivos dunha lei que son compartidos por todas as forzas políticas, dado que foi, no seu día, aprobada por unanimidade tanto do Congreso dos Deputados como do Senado.

A decisión do Goberno da Nación, coherente coa formulación da súa actuación política xeral, de non presentar ás Cortes Xerais un novo proxecto de lei de medidas fiscais, administrativas e da orde social, imposibilitou que a determinación do novo prazo se producise por unha canle de tramitación lexislativa ordinaria, similar á utilizada para as prórrogas realizadas nos dous últimos anos.

Apréciase, por todo iso, que na situación descrita concorren as razóns de extraordinaria e urxente necesidade que, conforme as previsións constitucionais, aconsellan a promulgación dun real decreto lei que estableza, de maneira definitiva, os prazos para a resolución dos procedementos derivados da Lei 16/2001, do 21 de novembro.

Na súa virtude, en uso da autorización contida no artigo 86 da Constitución, por proposta da ministra de Sanidade e Consumo e logo de deliberación do Consello de Ministros na súa reunión do día 3 de decembro de 2004,

DISPÓÑO:

Artigo único. *Prazo de resolución dos procesos.*

Para efectos do previsto no artigo 42 da Lei 30/1992, do 26 de novembro, de réxime xurídico das administracións públicas e do procedemento administrativo común, o prazo para a resolución dos procesos de selección e provisión convocados ao abeiro da Lei 16/2001, do 21 de novembro, queda fixado en 12 meses contados desde o día seguinte ao da entrada en vigor deste real decreto lei.

Disposición derogatoria única. *Derrogación normativa.*

Queda derogada a disposición adicional novena da Lei 16/2001, do 21 de novembro, e cantas disposicións de igual ou inferior rango se opoñan ao disposto neste real decreto lei.

Disposición derradeira primeira. *Habilitación competencial.*

Este real decreto lei dítase en virtude das competencias exclusivas do Estado sobre bases e coordinación xeral da sanidade e sobre bases do réxime estatutario dos funcionarios públicos, establecidas no artigo 149.1.16.^a e 18.^a da Constitución, respectivamente.

Disposición derradeira segunda. *Entrada en vigor.*

O presente real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 3 de decembro de 2004.

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO

MINISTERIO DE INDUSTRIA, TURISMO E COMERCIO

20653 *REAL DECRETO 2268/2004, do 3 de decembro, polo que se modifica o Real decreto 439/2004, do 12 de marzo, polo que se aproba o Plan Técnico Nacional da Televisión Dixital Local.* («BOE» 292, do 4-12-2004.)

O artigo 3.1 da Lei 41/1995, do 22 de decembro, de televisión local por ondas terrestres, establece que lle corresponde ao Goberno a aprobación do Plan Técnico Nacional da Televisión Dixital Local, á vista das solicitudes presentadas polas comunidades autónomas e tendo en conta as frecuencias dispoñibles. En execución do devandito mandato aprobouse, mediante o Real decreto 439/2004, do 12 de marzo, o Plan Técnico Nacional da Televisión Dixital Local.